

焦氏說梣

說楷小序

余兄茂孝負絕人之才王深嗜

古學於典籍靡後得家必所不涉博極

羣書而目無再過所爲詩若

古文辭靡所不詣落筆千言

而手無腐毫人所矜三窮年

者以談笑致之何其異也每披

覽有會与夫聞見所經輒以劄

記久之成帙題曰說楷試一展

說楷所紀

讀洵為新外功臣但多浸濫不經之說以出華繁玉振領異標新真可以

揮塵詞場分鑣執苑者矣

余兄少而奇穎三歲善屬對十三

補博士弟子負十七省墓東省  
會學使者行部至面試之見其  
文絕出一時時使者自作剪帽  
賦未就因以屬兄文成絕嘆以  
爲奇求及入棘闈中之牘競相  
賞異已擬第一人而爲直指所

厄撤所對策不使入遂不獲與

可惜

解額東省士至今談及未嘗不  
扼腕也遷延十餘年始得一當  
主司業錄經義以式且署云當  
獨擅江左而復以論義稍奇格  
不得前何歟余兄了不置愠喜

而一斂向時豪邁之氣緝志於  
學識者咸謂其刻華返樸大  
受可期迨一上春官歸輒抱病  
委頓幾十年所其間瀕死而生  
伯兄暨余所為調護者萬方亦  
既有起色矣而倏罹摧萎豈非

此等  
古人矣

命哉猶憶其病中津、謂余於  
左傳一書殊有獨解侯疾稍間  
當為十論以發其義而今已矣  
昔夏侯湛贊東方生云雄節  
邁倫高氣蓋世余兄其殆近之  
俾獲老其才以盡於用應無難

附古之三立以聲施後世而卒使  
菁華隱沒芳流歇絕良足悲已  
余也椎魯多似入奉教於嚴君  
退商擁於伯仲家庭之間自相  
師友致足樂也乃不四五年而二  
兄相繼淪逝搖々此身觸處成



礙人琴之慟如何可云每手是  
編直悽絕不忍復讀矣

萬曆癸丑冬仲弟潤生書

贊譽中仍有一種尚朴之致

至後路情緒纏綿可云得

體

東海翁題

焦氏說楮卷之一

孫卿曰說楮者勿聽也說而使人勿聽說何爲也曰不然也世無不可聽之言而有不必聽之言見可聽者不必也見不必聽者不可也吾之說無不可聽而有不必聽故曰說楮也物之小大常相準也事之常與怪者常相參也使怪者常斯常者怪矣小不聯斯大者積矣吾之說不常而皆其小者也不常則常人疑之小則爲大者遺故曰說楮也

楊自

萬曆癸巳季夏焦周題

天一太一天極北極卽北辰星又謂之耀魄寶又謂之昊天上帝北辰星五其一明者爲太一之常居也

紫微曰紫宮太微爲天德中有五帝座蒼帝威靈仰赤帝  
赤熒怒黃帝含樞紐白帝白招拒黑帝叶光紀卽五緯  
應五行少微在太微西一曰處士杜詩寂寞江天雲霧  
裏何人道有少微星

三台一曰三能卽秦階也在魁下起文昌抵太微西二星  
上台爲司命主壽中二星中台爲司中主宗室東二星  
下台爲司祿主兵上階上星爲男主下星爲女主中階  
上星爲公侯下星爲卿大夫下階上星爲士下星爲庶  
人獨曰三公非也三能色齊主君臣和不齊爲乖

五星東方歲星十二歲而周天南方熒惑三十三歲而周  
天西方太白八歲而周天北方辰星一歲而周天中央

鎮星二十八歲而周天歲星爲貴臣熒惑爲小兒歌舞  
嬉戲太白爲壯夫處林麓辰星爲婦女填星爲老人婦  
女

日月之會十一月星紀十二月玄枵正月娵訾二月降婁  
三月大梁四月沈寔五月鶉首六月鶉火七月鶉尾八  
月壽星九月大火十月析木

觜參間有沈寔高辛氏子天駟旁有王良傳說星主後宮  
禱祠之事

說文物中久雨青黑曰黴楚辭顏黴黎以沮敗淮南子顏  
色黴墨

五色爲慶雲一曰卿雲一曰景雲三色爲商雲或曰外赤

內青曰喬雲呂覽有雲於

冬日古呼黃奶子養生家謂脾爲黃婆子貧人呼冬日爲黃楔子

蠻烟蜃雨

斗七故天數多準七有十八宿皆七也左氏曰天以七紀日月五行璣政亦七易曰七日來復極永之晝時七則回夜亦如之詩云終日七襄是也僧家數亡者亦用七時甲子五日一周周六而成月日甲子兩月一周周六而成歲歲甲子六十歲一周周六而爲三百六十倮蟲左百六十而人長之毛蟲三百六十而麟長之羽蟲三百六十而鳳長之介蟲三百六十而龜長之鱗蟲三百六

十而龍長之。水木用陽。六甲六壬火用陰。六丁而土金不用。

乾爲天。坤爲地。乾坤合而爲泰。德爲父。紅爲母。德紅合而爲束。干爲君。支爲臣。支干合而納音生。

孟婆徽宗小辭。孟婆孟婆。你做些方便。吹箇船兒。倒轉孟婆。可與颶母對。

萬民皆付西王母。惟王聖人。道人真人。仙人之命。上屬九天君。

開元高太素隱商山。起六逍遙館。各製一銘。冬日初出。銘曰。折膠墮指。夢想負背。金鑼騰空。映簷白醉。樓攻媿嘗取白醉名。閣余謂可與黑甜作對。

心星房星皆兩形與男子婦人遞爲雌雄又靈經兩體自  
爲陰陽故能媚人今有人疴余兩都各一見之  
水虹屈霓也主雨風虹月暈也主風

榮露騰軒蕭雲掩閣榮露甘露蕭雲卿雲也

山雲草莽水雲魚鱗旱雲烟火涔雲波水

日雲赤曇月雲素雯

金韞宋人启金韞秩序玉宇粲涼

日斜日曉越絕漁父歌日昭昭浸以曉莊子日方中方  
楊用修詩渴虹下飲玉池水睨日斜分蒼嶺霞

渴日競辰

夏日爲槐序王晏詩槐序候方調

秦時太白星竊織女侍兒梁玉清逃入衙城小仙洞十六  
日不出天帝怒命五丁搜捕太白歸位玉清有子名子  
休配於河北行雨每至小仙洞恥母淫奔之所輒回故  
其地少雨

玄冥之子曰壬夫娶祝融之女曰丁芊俱學水仙是爲溫  
泉之神韓詩女丁夫壬傳世婚今星家以丁壬爲淫合  
混元聖紀云混元一始萬劫至於百成百成亦八十萬億  
年而有太初太初之時老君從虛空下爲太初之師又  
自太上生後復八十一萬億八十一萬歲乃生一炁李  
詩天子九九八十一萬歲歲長傾萬壽杯

阮藉詩陽和微弱陰氣竭海凍不流綿絮折庾肩吾詩勁



氣方凝海清威正折綿張說詩塞上綿應折江南草可  
結山谷詩霜威能折綿風力欲冰酒文人之相勦如此  
麥氣始清和何遜句也荆公晚風生麥氣本之

潘岳述哀詩雨絕無還雲太白全用其語

宅西曰昧谷古注疏引之作度西曰柳谷柳一作櫨字訓  
云穀日出之色櫨日入之色周禮注衣袷柳之材曰柳  
之爲言聚也諸飾之所聚鄭司農云柳者諸色新聚日  
將沒其色兼有餘色也余鄉李士龍云柳從𠂔𠂔古酉  
字酉正日入時羣色著木上故曰柳谷此說甚奇李通  
六書言或有據

罽栗亦名風管詩一之日罽發蓋寒風悲慘罽聲似之諺

云三九二十七籬頭吹簫栗是也莊子所謂地籟宋玉  
所謂土囊殷仲文詩爽籟驚幽律哀壑叩虛化

周禮漏下三商爲昏商音滴蘇易簡文三商而眠高春而  
起淮南子經於泉隅是謂高春頻於連石是謂下春梁  
元帝詩斜景落高春又高春斜日下薛能詩隔溪遙見  
夕陽春南史求衣昧旦旻食高春王僧孺表高春之景  
一斜不周之風忽至駱賓王露布照盡高春雲昏乙夜  
李義山詩碧空隨轉笠紅燭近高春柳子厚詩空齋不  
語坐高春

王冰注素問引月令七十二候與今呂氏春秋及曆中所  
載不同如桃始華爲小桃華雷乃發聲下有芍藥榮田

鼠化爲鴛下有牡丹華王瓜生作赤箭生苦菜秀作吳  
葵秀麥至作小暑至蟄蟲坏戶下有景天華按牡丹不  
經見天寶間始有木芍藥其名猶未立也周公作月令  
豈豫知後世之有此耶 古者多仍自然  
明者吐氣者也故火曰外景幽者含氣者也故水曰內景  
古詩繁星衣青天注作依非也春秋緯代殷者姬昌曰衣  
青光衣之爲言被也

僧規以六時經行六時宴坐經行六時曰幽谷時寅高山  
時卯日照高山平地時辰可中時巳正中時午鹿苑時  
未劉長卿詩六時行徑空秋草

玉女投壺每投十枝百二十梟設有人不出者天帝爲之

醫嘯楊大年詩書題枉自藏三尺壺史誰同賽百嬌嬌  
本臬字 醫嘯 耗睗

漢書律曆志上元至伐桀之歲十四萬一千四百八十年  
列子楊子云伏羲至今三十餘萬歲邵子皇極數斷以  
天地始終止十二萬八千年參之二說天地之始終且  
兩過矣

田家以夜雨晝晴爲夜春

斗有母徐理見之而生遁有母戴淳見之而死

春梢

夏不改正商不改月周則改正以示統改月以隨正  
人能盡數天星則徧知基勢

積麥以十辛日下子不得過三辛收潑不得過二辛上場入倉亦用辛日

天神之大者昊天上帝卽耀寶魄也亦曰天皇帝大帝亦曰太一其佐曰五帝東方青帝威靈仰南方赤帝赤熛怒西方白帝白招拒北方黑帝叶光紀中央黃帝含樞紐一說蒼帝名靈符赤帝名文祖白帝名顯紀黑帝名玄矩黃帝名神斗

酉陽雜俎諾臯記載天翁姓張名堅字刺渴漁陽人竊騎劉翁車乘登天劉翁遂失治又晉咸康中士人周謂死去見天帝面方一尺曰此古張天帝耶左右曰上古天帝久已化去此近曹明帝也豈天帝猶在輪迴真如釋

氏之說耶

漢元帝永平中日無光長安無鳥物類相感志云日無光則日鳥不見日鳥不見則飛鳥隱竄

水生於金故百川發源皆自山出由高趣下歸注於海日爲陽精光耀炎熾一夜入水所經焦渴百川歸注足以相補

望月滿之名也月大十六日小十五日日在西月在東遙相望也朏月未成明也魄月始生魄然也承大月月生二日謂之魄承小月月生三日謂之朏月暈左角角蟲多死

羅睺此云障持化身長八萬四千由旬舉手掌障日月世

云日月食佛誠云修羅修羅汝莫吞月月能破暗能除眾熱

電主醬味不正當時取一二升醬甕中卽如本味

正月雨水夫妻各飲一盃還房當獲有子神効也

正朝占四方風來從南旱從北湛從東疫從西兵

子日沐令人愛卯日沐令人白頭

雨露沾衣裳者謂潤兵不沾衣裳者謂泣軍

南齊志漢尚書令黃香曰日蝕皆從西月蝕皆從東無上

下中央者

冬至日陽之進也夏至日陰之進也故於文爲晉晉者進也二至之日也今作晉省文也

氣行於身與日相應日行二十八宿又三十六分人氣行  
一周天亦一千八分凡經脉一周長十六丈二尺人一  
呼脉再動一吸亦脉再動呼吸動息脉五動閏以大息  
凡十息氣行六尺二百七十息一周於身漏下二刻日  
行二十分二千七百息氣行十周於身漏下二十刻日  
行五宿又二十分至一萬三千五百息氣行盡五十營  
周於身計八百一十丈應漏下百刻日行二十八宿終  
常以一十周加之一分又十分分之六則奇分盡矣從  
房至畢爲陽陽主晝自昴至心爲陰陰主夜凡日行一  
舍漏下三刻又七分刻之四一刻氣在太陽二刻氣在  
少陽三刻氣在陽明四刻氣在陰分蓋一舍而與陰分



矣漏傳不止氣行亦然

氣之運行凡一時一千二百四十五息一晝夜計一萬三千五百息

風鳴葉者賊在千里鳴條者百里搖枝者四百里金器自鳴及焦器者軍疲也氣如驚鹿敗軍氣也

南嶽有雨師似蛹長七八寸似蛭又有雲師如蠶長六尺似兔天有雲雨輒出石上肉甘可食

甲子逢單日爲雄雙日爲雌雌甲子雖雨不害詩云老尚誇雌甲狂寧作散仙

天王在位化成道昌則心星見刑罰平則井星明道被草木營室歷九象而可觀天下和平五穀豐稔則胃明天

下大安四夷來玉則畢明天下和平賢人進用則角明  
軍儲藏府盛則觜觿明

微子感牽牛星顏淵感中台星張良感弧星樊噲感狼星  
夏后氏金行初作葦菱言氣交也殷人水德以螺首慎其  
閉塞使如螺也周人木德以桃爲梗言氣相更也

金波謝舉詩勢高凌玉井臨迴度金波謝朓詩金波麗鵲  
鵲玉繩低建章

春秋分夜半時汲井水滿瓮中封閉七日發視有水花生  
於瓮面如輕冰可採爲藥

五日作赤靈符以辟兵唐詩欲謝君恩却無語胸前笑指  
赤靈符

麟亡星落月死珠傷

麒麟闔而日蝕鯨魚死則彗星出嬰兒啼婦乳出

珠胎與月盈虧月死而螺蚌焦又蚌聞雷聲則厥

織女耀而瓜薦大昴中而芋食

西海之西有浮玉山陰火出焉海賦陰火潛然顧況詩陰

火暝潛燒

鹽泉海目油井水脂

河北得水爲河塞外得水爲海少而多之也滇雲稱山曰

長坡貴竹名雨曰清露多而少之也

河厲

九圍 九有 九藪 九縣

太山爲天孫

火井在臨邛汲之得硫黃油蜀都賦火井沉熒於幽泉

火泉在延壽縣南山 火池在伏龍山 然石出建城  
縣色黃理疎以水灌之則熱安鼎其上可炊也

沓潮唐詩屯門積日無回颶滄波不歸成沓潮

蜀自綿谷葭萌道路險窄擔者不容易肩故云左擔杜詩  
左擔犬戎屯

澄水泉一名流渠出滄洲久視山金石不沉洲人以瓦鐵  
爲舩

秣陵孟娘山有白塿土周護以調塗四壁因呼隱士泥

京師眼福錢福病福屏帷福吳越口福洛陽花福蜀川藥

福秦隴鞍馬福燕趙衣裳福

睢州無北門邳州不迎春云迎春蜴能螫人至死蕭縣不

撞鐘撞之則水至

水与鐘石不共也

列子伊尹生於空桑尚書大傳伊尹母行汲化爲空桑父  
尋至水濱見桑穴中有兒演孔圖徵在遊大家之陂生  
孔子於空桑呂氏春秋顓頊生自弱水實處空桑今冀  
北有空桑山陳留南一十五里亦有空桑山又魯南亦  
有空桑山今名空竇按楚辭考玄冥於空桑豈顓頊之  
生當在冀北孔子之空桑在魯南而伊尹生於陳留之  
空桑山無疑矣

胥濤

日中而市曰集市罷則虛曰虛峒岷詩綠荷包飯赴虛人  
瀚海火州柳城東北沙深五尺大風則行者人馬相失沙  
中生草名登相可食非眞尾間也今云瀚海波澄者固  
誤張茂先亦以霍去病北伐至瀚海爲北海何耶

按遼史西夏出登廂一統志韃靼產東牆似蓬草實如  
稂子十一月始熟子虛賦雕胡東牆廣志東牆色青黑  
粒如葵子似蓬草十一月熟出幽涼並烏九地魏書烏  
桓地宜東牆今甘涼銀夏之野沙中生草子細如罌粟  
堪作飯俗名登粟一名沙米按登粟登廂東牆皆登相  
之誤不必瀚海始有之也

溪毛山寒石髮瘦水落溪毛凋

嵩山有玉女搗帛石秋夜聞杵聲 賸後之說

武都山精化爲女子蜀王開明納之物化築壠數畝以石鏡表其門

燕土盧故爲盧龍盧黑也淮南子女媧殺黑龍以濟冀州濟性勁源於晉伏流地中乍見乍伏一支穿太行爲百泉一支爲濟源出山東爲七十二泉漢性曲其流十里九灣郢沔之間渚爲澤藪皆漢之漾也語曰勁莫若濟曲莫如漢

雲林石譜湘鄉縣巔有石臥生土中形酷類魚燒之有魚腥氣又隴西地名魚龍掘地取石亦多魚形與湘鄉所產無異杜詩水落魚龍夜正謂隴西耳

禹貢導渭自鳥鼠同穴孔穎達曰一鳥一鼠共爲雌雄同穴而處山因得名蔡仲默以爲不經岳季方戍莊浪見鳥頂出毛角鼠缺脣似兔蓬尾似鼬彼此相狎孔說如此而誕之蜀犬吠日蔡見也夫

復生不可求

甘肅志涼州有兀兒鼠尾若贅疣鳥曰本周兒形似雀色灰白杜詩水落魚龍夜山空雀鼠秋或謂以魚龍水對雀鼠山見西溪叢語及覽岑嘉州魚龍川北蟠溪雨鳥鼠山西洮水雲始知西溪有所本耳

天苴卽天巴天漢天棧山有天谷卽青城山天際楊雄蜀本記曰有王曰杜宇出於天鵲山有朱提氏女爲杜宇妻曰望帝石有天牙又海曰天池江曰天塹



崑崙山北地轉下三千六百里有八玄幽都方二十萬里  
地下有四柱四柱廣十萬里地有三百六十軸犬牙相  
錯

地南北三億三萬五千五百里中爲崑崙廣萬里高一萬  
一千里出五色雲五色流水最中八十城布繞之中國  
東南隅居其一分是奸城也

地有四遊冬至地上北而西三萬里夏至地下南而東三  
萬里春秋二分其中也

河出崑崙墟江出岷山濟出王屋淮出桐柏渭出鳥鼠漢  
出嶓冢洛出熊耳涇出少室汝出燕泉泗出陪尾沔出  
月台沃出太山  
所以補名貢之未備

君山有道與吳包山潛通上有美酒數斗得飲者不死  
廷州灞水金銀鍤器盛之皆漏惟瓠葉不漏

徐州人謂土爲蓬塊吳人謂土爲跋跋

漢人適吳設筭問之竹也歸而煮簣不熟謂妻曰吳人輶  
輶欺我如此博雅輶輶車軌道也

蜀人曰川藟且一作藟藟

益陽州人夜同寢每無故忽相打曰沙魔

龜山西南十里有漏澤澤五穴春夏盈秋冬涸將漏時先  
有聲居人扃穴取魚隨秔麥水至麥已稔矣

鯀化爲黃熊入於羽淵今在沂州東南二十里羽山下名  
羽潭一名羽池傍生細柳獸不敢踐

王子年拾遺錄沈羽淵化爲玄魚後人修玄魚祠以祀之嘗見其浮躍出水長百尺瀆水激浪必降大雨

卽墨東南六十里有大勞山又名勞盛山夫差登之得靈寶度人經樂子長遇仙授以巨勝赤散方服之百八十歲登此山仙去秦始皇至此登蓬萊立馬陰山遣石人驅此山不動故又名牢山石人今陰山及海濱諸山往往有之

梓桐山有鬼谷洞鬼谷弟子蘇張輩五百餘人鬼谷爲作窟深二丈曰有能在窟中說使泣者則能分人主之地矣秦下說之鬼谷泣下

濟南郡臨山有鳥名王母使者漢武登此得玉函化爲白

生北婦  
來已印  
水部

鳥飛去世傳上有王母蔡函鳥常守之故名函山

按青州志又以爲沂山佚考

籠水一名孝婦河齊有孝婦顏文姜事姑孝遠道取水不以寒暑易心靈泉生於室文姜嘗以緝籠蓋之姑怪其須水卽得發緝籠竊觀之水卽湧湧壞其居宅

古平陵城西北有陰地數畝天色澄霽亦若雲陰記謂青州有地鏡水影亦此類也

齊國有山山有泉如井深不可測春夏時雹從井出常敗五穀人以柴塞之不塞輒出號曰柴都

諸城有孝子灣亘四五里清瑩不涸嚴冬冰合惟中央二三尺不凍相傳王祥臥冰處上有祠西遷注洛城澗水

西數里有孝水上有王祥祠塚或以爲臥冰處非也西  
征賦止云澡孝水之濯纓而水經注亦不及臥冰事其  
爲傳會無疑一統志望江有臥冰池沂州有王祥河一  
名孝河又云孝塚在沂州北二十五里祥臨沂人此或  
爲是

秦山上多玉下多金有獸狀如豚而有珠名曰猗猗

濟南郡方山南有明鏡厓石方三丈魑魅行伏了了鏡中  
南燕時鏡上有漆山神惡其照物故漆之永州祁陽縣  
浯溪山岩側有石廣數尺光照十餘步土人謂之石鏡  
杭州臨安縣山中一石光明如鏡盤山三湖中湖有石  
鏡半規能鑒天目山河人物

犀山本海中山山神好移海神鎖之挽鎖斷飛來猶有鐵  
索大如人臂繞山再匝海花之事不知何處  
朝陽之谷神曰天吳是爲水伯其爲獸也十八尾八首人  
面八足吳音華後漢戴就被收獄吏燒鋸斧使就挾之  
注引何天承纂文張揖字詰鋸音華又詩不吳不敖不  
吳不揚皆音華 水伯

波臣波臣亦可對海客牛僧孺詣于頓頓以海客遇之  
東海渚中有神人面鳥身珥兩黃蛇名曰禺獠黃帝生禺  
獠禺獠生禺京禺京處北海禺獠處東海

東海有流波山入海七千里有獸如牛蒼身無角一足出  
入水則風雨光如日月聲如雷其名曰夔黃帝以其皮

爲鼓振以雷獸之骨聲聞五百里以事類考證  
登州海畔有大石龜相傳魯般作夏則入海冬復止山上  
陸機詩石龜常懷海我寧忘故鄉臨邑有葉公墓碑跌  
龜常負碑入水上常有萍藻有伺之者因叫呼龜乃走  
墜折碑焉以事類考證

蒙山有季隨隱跡蕭穎士蒙山詩子尚捐俗紛季隨躡遐  
軌

禹獲渦水神鎖之龜山曰無支祈一作巫支祈無巫音近  
而譌耳形若彌猴伸頸百尺力踰九象東坡詩川鎖支  
祈水尚渾

瀟山一名天柱三峰鼎峙拒雲曄日

震旦又作真丹王半山辭將他死語圖度怎得離真丹

涼州爲塞北江南歷下有湖山之勝號小江南唐韋蟾詩

塞北江南舊有名

連州有斟溪一日十溢十竭安寧州有潮泉一日三溢三

蘸貴陽有漏洩一日百盈百涸京師有滿井水湧尺餘

歷下諸泉夙湧三尺今漸減每涸之輒復湧

東海之別有渤海南海之別有漲海西海之別有青海北海之別有瀚海

鰈海魏收文苑龍荒而牧駿池鰈海而觀魚余謂鰈海亦

可對鳳林水經注鳳林山五蠻俱峙杜詩鳳林戈不息

魚海路常難張藉詩鳳林關裏水長流岑參詩鴈塞通



鹽澤龍堆接醋溝郭緣生述征記醬魁城至醋溝凡十里

子胥諫夫差曰齊晉山居陸處豈能越十七阨以有吳哉十七阨可對百二關

晉書紫濛移構玄塞分疆紫濛山慕容氏所居

茶首茂蔡滇中兩頭鹿出青華洞洞峪奇詭昔人糜糖以入殆十許里炬滅而返自後無人窮其際者

臨朐逢山有石鼓天下亂則聲聞數十里長興夏駕山有石鼓鳴則三吳有兵冀縣大鼓山有石鼓河鼓星動則石鼓鳴鳴則秦土有殃蜀中出石鼓無聲張茂先謂桐木刻魚擊之可聲聞數百里吳興故鄣縣海

溪山直豎一石磨聲若風雨土人云轉疾則年豐轉遲則年儉信豐有石塔高九重而無影影見則災華山高若四合重嶺秀起上有石池池北有石鼓

洋山在海中有廟廟門神曰呂門官厨多鼠夏多蠅預告其門神卽絕

自三危積石負東北地絡之陰東及泰華北抵常山東狗塞而至朝鮮是謂北紀自岷山嶓冢負西南地絡之陽東及泰華南踰江漢東狗嶺而至閩是謂南紀北戎爲胡門南戎爲越門

自北紀之首與地絡相會分而東流與涇渭濟相表裏謂之北河自南紀之首與地絡相會分而東流與淮漢相

表裏謂之南河

橘踰淮而北爲枳鸛鵒不踰濟貉踰汶則死鄭玄以爲汶水非也水土異性故舉四瀆言魯汶水闊不過數里源不過二百里揭厲皆渡斯須往還豈狐貉暫游生死頓隔哉

海外蓬萊閬苑有五岳靈山一曰廣乘山天之東岳在東海中居九氣青天之內二曰長離山天之南岳在南海中居二氣丹天之內三曰麗農山天之西岳在西海中居七氣素天之內四曰廣野山天之北岳在北海弱水中居五氣玄天之內五曰崑崙山天之中岳在八海之間上當天心形如懸蓋東曰樊桐西曰玄圃南曰積石

北曰閬苑居於中元一氣天中焉 仲尼得道爲真官

住廣乘山

孔子當時所居以修仁之宮也

初

河南志首陽山凡五惟偃師首陽世傳夷齊隱此上有夷齊墓然蒲坂首陽亦有墓有祠

永城北四十里有鄧陽相傳爲鄧侯食邑用修云蕭何食邑在襄陽之光化縣漢有兩鄧侯豈遂爲兩地耶豈襄近關中永城近雒遂各以封耶侯封由地起名未聞改地名以從之者

用修謂蕭何食邑鄧在襄陽光化始竊疑之及考茂陵書蕭何國在南陽鄒氏分明云沛郡之鄧音嗟南陽之鄧音贊不聞在襄陽也

班孟堅十八功臣銘文昌四友漢有蕭何序功第一受封  
於鄜是鄜與鄴本爲二地班漢人必得其真顏師古直  
以何封南陽何李濟翁至訝人呼巋侯併其音義名實  
盡失之唐詩麒麟閣上識鄜侯史記作鄴或後人傳寫  
之誤耳

水經注瀘水傍瘴氣特惡中有物不見其形其作有聲中  
木則折中人則害名鬼彈蜀都賦鬼彈飛丸以燔燉  
水經丁溪水在泗水東泗水冬春淺澁常排沙通道陸機  
賦乘下水之捷岸排泗川之積沙牧之詩疊嶂巧分丁  
字水

南岳之鎮曰衡以其分當軫翼光輔紫宸鈴三氣之根鈞

五靈之德上列注生之宿下符長育之功稱物平施故  
謂之衡山五岳真形圖云潛霍廬麻玉笥洞陽小有  
九疑羅浮等十山爲之佐命復有神仙聖境曰朱陵洞  
洞天也

衡山雲密峰禹治水登焉立碑紀其山高下丈尺皆科斗  
文字近代樵人或遇者其碑至靈隱而不見

上真記云太虛真人領南岳司命卽炎老君也潛山真人  
鮑君嗣治霍山真人韓君佐治金華真人黃君初平天  
柱真人左君元放南霍真人鄭君思遠霍林真人許君  
聯丹霍真人周君陽紫虛元君魏夫人華存並居佐命  
之曹吳越楚蜀之會皆當司察之

不似別河  
要必可  
其不夫  
孰從之

斷石源有石高數丈闊數尺而中斷上有鐫字云此有丹砂水如乳而甘香得掬飲之可壽千歲遊者到此唯聞下有流水聲左聽落右右聽落左罕有遇者

### 石衣海髮

白公杭州春望詩紅袖織綾誇柿蒂青旗沽酒趁梨花杭土產綾曰柿蒂不知者妄改柿葉又杭俗釀酒趁梨花時熟號梨花春

嵩高少室廟神爲啓母塗山氏妹韋蘇州詩釣臺水綠荷已生少室廟寒花始徧楊盈川少姨廟碑虞帝二妃湘水之波瀾未歇蔣侯三妹青溪之軌跡可尋

雲南志風土多煖至有八蠶吳都鄉貢八蠶之綿李商隱

燒香曲八蠶綿鹽分小炷獸焰微紅隔雲母抱朴子南海晉安有九熟之稻可對周禮禁原蠶淮南子原蠶一歲再熟王法禁之者爲殘桑也注爲其傷馬以蠶爲末塗馬齒卽不食以桑葉拭去乃食蠶馬類也物莫兩盛如此

自岱山及二天富皆取海水煉鹽所謂熬波也宋人茶馬表摘山對歷塊余謂亦可對熬波又鹽曰金鹵茶曰玉茸又鹽爲天藏茶作月團

武都丈夫化爲女子顏色絕美蜀王納之無幾物故遣五丁擔土作冢蓋數畝高七丈號武擔山其石俗名石笋或曰下卽海眼一云昔爲大秦寺門樓十間皆以真珠



翠碧貫之爲簾雨後多拾得杜詩君不見益州城西門  
陌上石筍雙高蹲古來相傳是海眼苔蘚蝕盡波濤痕  
雨中往往得瑟瑟此事恍惚難明論

峭壁則崩剝而通風懸崖則摧頽而瀉日  
汶上縣有思聖堂堂前有石準坎其中書大準字游魚在  
四隅取平政之義蓋孔子遺物汶上卽古中都

炎帝祠在衡州二杉一榮一枯大數十圍高不可測根節  
如鐵石乃異人所種莫敢剪伐

武當山在襄陽均州南三舍許盤亘八百里上有七十二  
峰中有三十六岩二十四澗羣峯擢秀靈氣攸集是爲  
嵩岳之儲副荆襄之洞天福地也

滁志庶子紫薇香泉萬斛以爲供給瑯琊幽谷白雲千頃  
以爲職田

瓊海之潮不以晝夜望以前東流望以後西流  
洞庭爲長江巨浸君山在洞庭孤絕處春冬則蔥蒨彌望  
秋夏則浩渺兼天

青原山甚高峻前有劃壁一片跨深澗而立若翠屏然諸  
峰環拱老樹插其左右泉潺潺灌林中景象殊爽

建康之鷄鳴每日濱於二春萬雲流西閣暉而夕姿態橫  
生一睹百變

真寧是軒轅葬衣冠處山中靈湫神龍所蟄中有落葉鳥  
輒銜去

吳興米炊之甑香白馬豆食之齒醉

鄴中產巨粟脫其殼可以爲盃

琴莊有溶溶軒軒前有池度池得回筇磴上自在峰蘭先生日往峰上採蕨蕨生九股以釀醋異常守臣取進之封峯曰瞬碧侯

鷺管山霜可染紫白庶潭露能染紅爲天下冠

強村有水方寸許人欲取之唱浪淘沙一曲卽得一盃名樂音村

無棣有灰山山南有石竅其中二麥無數取之不極

甘塘社有秘密泉牛馬猪羊飲之肥澤鷄鴨鷺鴈飲之輒死

山中有葱下必有銀有薤下必有金有薑下必有銅錫山  
中有王者木旁枝下垂謂之寶苗

海南有桃竹江西有夾竹桃唐順之詩桃竹舊聞生碧海  
竹桃今見壓朱欄

揚州在唐時最爲富盛舊城南北十五里一百一十步東  
西七里三十步有二十四橋最西濁河茶園橋次東大  
明橋入西水門有九曲橋次東正當帥牙南門有下馬  
橋又東作坊橋橋東河轉向南有洗馬橋次南橋又南  
阿師橋周家橋小市橋廣濟橋新橋開明橋顧家橋通  
泗橋太平橋利國橋出南水門有萬歲橋青園橋自驛  
橋北河流東出有叅佐橋次東水門東出有山光橋又

自衙門下馬橋直南有北三橋中三橋南三橋號九橋  
不通船不在二十四橋之數

鍾山之神名曰燭陰視爲晝瞑爲夜吹爲冬呼爲夏不飲  
不食不喘不息身長千里人面蛇身赤色以形  
有一歷陽母門吏告汙血於門限母使上北山縣果陷水  
中母遂化爲石淮南子云歷陽之都一夕成湖論衡亦  
云歷陽之郡一夕化成湖

未央殿東北二里許蓋鍾室故處有丈餘隙地草色皆殷  
赤傳是韓淮陰血漬華清池石蓮花上有殷紅數點云  
是太真入月所遺入月漢書云姪變

金陵與水沉浮號曰地肺許渾詩高閣懷地肺遠賦憶天

胎漢北地郡靈洲縣在河中隨水高下未嘗淪沒號曰  
河奇濠州浮山洞在淮上夏潦不能及而冬不加高故  
人疑其浮也吳興郡南門外十里許大溪中有小洲廣  
一畝餘上草樹鬱然隨水高下名浮玉山

武夷山有石如立壁巔隱一泉分七派山僧顛堅名七絃  
水

塗山歌於候人始爲南音有娥謠乎飛燕始爲北音夏甲  
歎於東陽東音以發殷鼈思於西河西音以興

廬山官亭湖神能分風上下船皆便

怪出

叙州小梁山四時常雨霖霖不止俗呼大漏天小漏天  
沔陽有丙穴栢枝亦有丙穴丙向陽多產嘉魚或曰魚以

丙日出非也蜀都賦嘉魚出於丙穴子美詩魚知丙穴  
由來美子京詩可但魚知丙非徒字識丁

彰德府南郭村井產石墨可書東京賦黑丹石緇魏都賦  
黑井鹽池玄液素滋是也無勞山出石墨爨之彌年  
不消宜陽縣有石墨山汧陽有石墨洞贛州興國縣  
上洛山皆產石墨廣東始興縣小溪中亦產石墨婦女  
取以畫眉名畫眉石是也陶南村曰延安石液嘗考  
延州高奴縣石脂水膩浮水面可膏車炷燈名曰石漆  
宋時用以燒酒造墨不審石墨天成不假烟也南村未  
深考耳

石燭延安石油也可熏烟爲墨一名水肥一名石脂一

名石液唐詩石烟多於洛陽塵又方鎮編年錄云地脂食之不死嵩高山記嵩高山上有石室前有石柱上有石脂石脂滴下人服一合得仙

按黑石脂一名石墨一名石涅古者擣之以爲香煤張正見詩香散綺幕室石墨彫金鑪徐陵詩奇香分細霧石炭搗輕紈本草云久服延年亦出潁川陽城又石漆堪然博物志云酒泉南山出水如肥肉汁取著器中如凝脂正黑與膏無異魏武起三臺南曰金雀北曰冰井上有冰室室有數井藏冰及石墨焉石墨可書然之難盡亦名石炭

鹽麩子蜀人謂之酸桶博物志云酸桶七月出穗蜀人謂



之主音穗上有鹽著可爲羹亦爲酢桶吳人謂之吳鹽  
江南射工海南水弩水弩四月一日上弩射人八月後卸  
弩

豐山之鍾霜降則自鳴

江陵有猛人化爲虎好著紫葛人足無踵  
淮水出玳珠珠有聲

怯赤山出石絨織爲布火不然

禹戮防風御二龍行域外至南海經防風防風之二臣怒  
射之二龍昇去二臣恐以刃貫心禹哀之拔其刃療以  
不死之草是爲穿胸民

無肩民無男死埋之心不朽百年化爲人細民肝不朽亦

百年化爲人皆穴居

蒙雙民高陽有同產爲配帝放之此相抱而死神鳥以不死草覆之七年男女皆活同頸二頭四手

獠子婦人妊七月臨水而產便置水中浮則收沉則棄越雋國牛割肉不死經日肉乃復生如故金樓子大明底有白皮牛割肉明日愈

長肱卽長臂人臂長三丈穆王封於黑水之西河

三身國一頭三身三手容成氏有季子好淫帝放之遂妻馬生子人身有尾蹄

馬人昌黎詩衙時龍戶集上朔馬人來

大人國人乘雲不能走孕三十六歲生白頭龍類去會稽

四萬六千里

駭沐國解長子而食之曰宜弟父死謂母爲鬼妻棄之列  
子作輒沐國

然丘之國有比翼鳥銜南海之丹泥巢崑崙之玄谷遇聖  
則集

周靈王時浮提國獻神書二人或老或少或出或隱肘間  
懸金壺四寸上有五龍之檢封以青泥中有黑汁灑地  
及石皆成科斗之書

北海幽都黑水出焉上有玄鳥玄豹玄蛇玄虎玄狐是爲  
太玄之山玄丘之民

驩兜人面鳥口去南國萬六千里

驩兜人面鳥口去南國萬六千里

占城有屍致魚乃婦人目無瞳夜寢頭飛入人家食小兒  
穢氣氣侵兒腹必死頭返合體如故移其體則不合而  
死又南方有落頭蟲頭能飛亦人種以耳爲翼吳時每  
得之王元美謂無身之頭不知何物此豈非無身之頭  
也耶

猴獼長七尺人行與婦交生人蜀中西界多姓楊率皆猴  
獼化之子孫時有獼爪者

漠北有押不蘆食其汁立死

漠北種羊角能產羊其大如兔食之肥美

西漠有翔尾大於身之半非車載尾不可行也

沙漠雪盛命兩駝跌其旁終夜不動用斷梗架片氊其上

而寢處其下煖勝肉屏

江南以木架水面葑泥附之曰架田一名葑田隨水上下亦名盜田滇中名曰海鍾郭景純江賦播匪稅之芒種挺自然之嘉蔬交趾作駱田亦音架

回紇野馬川木曰瑣瑣燒之火經年不滅取根製帽入火不然

伊尹生空桑說者誕之虞伯生撰高昌王碑和林山二水出焉一夕有天光降於樹在二水之間樹生癭如妊越九月十二日而癭裂得兒五最穉者曰卜吉可罕壯遂爲君此更奇於空桑矣裔夷此類甚夥

沙漠羊順風而行每大風起舉羣萬計皆失牧者馳馬尋

逐有至數百里外方得者

挹婁國人穴居好養豕食其肉衣其皮冬以膏數分塗其身以禦風寒

琉球有象簞漢武金牀象席已先有之矣吠勒國織影犀爲簞文如錦綺武帝雜玉爲簞

勒畢國有細鳥形如大蠅狀似鸚鵡聲聞數里如黃鵠之音亦名候日蟲

漢武帝鑿昆明池有灰東方朔曰此劫灰也淮南子女媧氏積蘆灰以止淫水豈是物耶

黃花老人詩招客先開四十雙按雲南志五畝爲一雙又白夷田種其佃作三人二犁前牽中壓而後驅之犁一

日爲一雙以二乏爲巳二巳爲角四角爲雙王荊公詩  
臥占寬閑五百弓蓋佛家以四肘爲弓肘一尺八寸四  
肘蓋七尺二寸其說出譚梵

德建國烏澣河灘流中有火祇祠一銅馬國人言自天而  
下屈前足在室中後足入土穿視竟不及其蹄西夷以  
五月爲歲每歲烏澣河中有馬出其色如金與銅馬嘶  
鳴相應俄復入水按祇胡神也佛經所謂摩醯首羅本  
起大波斯國號蘇魯支有弟子名玄真習師之法居波  
斯國教坊記有牧護字李燕有牧護詞劉禹錫有牧護  
歌皆賽神語

異域志謂南海無男之女感南風而獲孕搜神記述零陵

太守之女飲盥水而有娠觀此則生玄鳥之卵以生商履臣人之迹而誕棄者未爲誣也

李白詩客到但知留一醉盤中祇有水晶鹽按梁天監中天竺王屈多遣長史竺羅獻方物云國有恒水甘美下有真鹽色正白如水精金樓子云胡中有鹽瑩如水晶謂之正華鹽酉陽雜俎云白鹽崖有鹽如水晶名君王鹽段公路北戶錄云鹽有如水晶狀者一統志撒馬兒罕土產水精鹽堅明如水晶琢爲盤以水濕之可和肉食又傘子鹽亦出北夷

恩州有鹽如絳雪又琴湖池中有桃花鹽色如桃花東坡詩紛紛青子落紅鹽是也蔡邕書云幸得無恙遂至



徒所自成以西惟有紫鹽也鹽池賦云爛然溪明晃爾霞赤是又有赤鹽矣

東至開悟南撫多鷄西服壽靡北懷弭耳

北夷酋長秋來春去謂之鴈臣鴈戶牝朝馬人

雀戶

永樂庚寅賢妃權氏侍駕北征至臨武薨諡恭獻妃朝鮮人穰粹善吹玉簫後朝鮮驛送妃父權永均至拜光祿卿尋遣歸自是貢女不至雁仙宮辭忽聞天外玉簫聲花底徐行獨自聽三十六宮秋一色不知何處月偏明王司絳宮詞瓊花移入大明宮旖旎濃香韻晚風贏得君王留步輦玉簫遶亮月明中是時有任順妃李昭儀

呂婕妤、崔美人俱朝鮮人。按王司綵、順德人選爲女官。權妃重之，特推同輦之愛。固辭，妾嫠婦，何敢充下陳。上愈重之。按萬曆甲午，平秀吉，欲進女求封，朝廷駭甚，不許彼肉食者，未知先朝故事也。

僬僥人長三尺，或云長一尺六寸。東北極有罽人，長九寸。武帝時，東郡送一人，長七寸，名巨靈。西海中有鵠國，男女長七寸，日行千里，遇鵠吞之，在鵠腹中不死。四地荒中有小人，長一寸。南志有小人如螻蛄，撮之滿手，得二十枚。鵠能吞之，則人亦易之。又務光，長八寸。張仲師，長尺二寸。呂夏卿，年老，身形漸縮如小兒。嶺南鶴巢鶴髮翁，亦漸縮如嬰孺。未多國人

長四寸、陶南所見人腊長六寸、章武有人腊長三寸、頭項髀肋成就、云是僬僥人

龍伯國人長三十丈、大秦國人長十丈、中秦國人長一丈、臨洮人長五丈、足履六尺、防風氏長十丈、一云四丈五尺、北極人長九丈、勒畢國人長三十丈、支提國人長三丈二尺、三手三足、各三指、多力善走、國內小山能移、取犀象相投擲爲戲

又穀梁傳長狄兄弟三人、一之魯、一之齊、一之晉、皆殺之、身橫九畝、斷其首而載之、眉見於軾、河圖龍文、佻國人長三丈五尺、晉史襄武縣大人見、長三丈餘、跡長三尺二寸、苻健皇始四年、大人見、長五丈、語百姓張靖曰、

世說  
代序  
初序

今當太平、俄而不見、健以爲妄、會大雨河渭泛溢、中流  
得一屨、長七尺三寸、足跡稱屨、指長尺餘、文深一寸、健  
曰、覆載之中、何所不有、張靖所見、定不虛也、拾遺苑渠  
之民、長十丈、南史、陳武帝永定三年、有人長三丈、見羅  
浮山、隋書、仁壽四年、有人長四丈、見於應門、迹長四尺  
五寸、異域志、長人國人、長三四丈、國初有使往遼陽、被  
風至其國、其人來挈舟、斬其一指、大若人臂、又河圖龍  
文、天之東南西北極、各有銅頭鐵額兵、又有金剛敢死  
力士、天中太平之都、有都甲食鬼鐵面、長皆三千萬丈、  
神異經、西北海外有人焉、長二千里、兩脚中間相去千  
里、腹圍一千五百里、又東南隅上大荒之中、有樸父焉、

夫妻並立其高千里腹圍自輔孔子曰長者不過十丈  
數之極也故不語怪

胡人彈骨越人剡臂中國哺盟

焦氏說楷卷之一終

焦氏說楮卷之二

紫蘭宮玉女王子登王母使也常出配北燭仙人

集弦膠出鳳麟洲亦名連金泥鳳喙麟角所煎

十洲記仙傳拾遺月支使者獻香出聚窟洲人鳥山樹如  
楓香聞數里名返魂樹伐其根于玉釜煮取汁火煎如  
黑粉名驚精香一名振靈丸一名返生香一名振檀香  
一名却死香老杜色難腥腐食楓香正用此乃羅景綸  
妄意佛經諸所興楓與香等殊可笑用脩博洽亦謬引  
何耶

南中異物志楓香樹似白楊葉圓而岐分有脂而香子大  
如鴨卵二月花發乃著實八九月熟曝乾可燒惟九真

有之

寧封服明莖艸見腹光通外採以藉足入水不沉明莖艸一名洞冥艸一名照魅草折枝爲炬照見鬼物太平廣記作洞腹艸

食四節隱芝者位真卿食金闕玉芝者位司命食流明金英者位司祿食長曜雙飛者位司命真伯食夜光洞草者總主在左御史之任

壺公女施存孔子弟子

劉商服真術而仙語云欲長生服山精

楊通幽爲明皇通問貴妃者也羅公遠同明皇遊月中者也

石曼卿主芙蓉城子建爲遮須國王

安期賜少君神樓散王君賜魏夫人遷神白騎神散金光  
化形靈丸

李泌乞爲道士代宗賜以紫衣道士賜紫自此始天后賜  
法朗紫袈裟僧賜紫自此始

仙家十寶人間九鏡

燭夜花四出深紅類杯仙家用以酌酒

王褒爲小有洞天主清虛真人

太極真人命北寒玉女宋聯涓彈九氣璫青童命東華玉

女烟景姝擊西盈之鍾陽洛神命雲林玉女賈屈延吹

鳳唳之簫清虛真人命飛玄玉女鮮于虛金拊九合玉



節太極真人發排空之歌青童吟太霞之曲神王諷晨  
啓之章清虛咏駕歛之辭

鹿皮公吞玉華而流羣出戶賈季子咽金液而臭聞百里  
黃帝火九鼎于荆山尚有喬嶺之墓李王服雲散以潛  
昇猶頭足異處墨狄因虹丹以入水甯生服石腦而越  
火務光剪薤以入清泠之泉柏成納氣而腸胃三滌

禹東澗生菖蒲一寸九節安期服之仙去但留玉舄

蟹漆相合成神仙藥

吹笙王子晉名喬在周飛鳥王喬在漢葉縣食肉芝王喬  
在益州北平山

樊昭王得洞光之珠以飾宮王母三降其地名曰洞宮楊

巨源詩洞宮曾向龍邊宿雲徑新從鳥外還劉滄詩沐  
髮清齋宿洞宮桂花松韻滿岩風

劉安見帝謬稱寡人罰守天廂非以鷄犬升也用修謬  
天女衣六銖衣或曰五銖衣詩玉肌無軫五銖輕上清童  
子衣五銖服

方丈洲有九源丈人宮主領天下水神及龍精巨鯨陰精  
水獸之屬

梯仙國宮室城樓悉是金銀珉玉所成初得仙者關送此  
國脩行七十萬日然後得至諸天或玉京蓬島崑閬姑  
射補仙官主籙主符主印主衣飛行自在也

度人經擲火萬里流鈴八衢杜牧之詩老翁四目牙爪利

集賢堂  
卷之二  
三  
擲火萬里精神高東坡詩仙風鏘然韻流鈴杜詩四目  
今譌四百

曼倩兒時至紫泥海有紫水污衣仍過虞淵湔洗朝發中  
返已是經年

黃公三千歲一反骨洗髓二千歲一刻肉代毛三洗髓五  
代毛

漢武帝所愛曰巨靈帝有青玉唾壺巨靈乍出入其中東  
方朔目之化爲青雀飛去帝乃起青雀之臺

周穆王薦清澄琬琰之膏以爲酒進洞淵紅蘂噉州甜雪  
崑流素蓮陰岐黑棗萬年冰桃千年碧藕青花白橘素  
蓮者一房百子凌冬而茂黑棗者其樹百尋實長二尺

核細而柔百年一熟

黃中李花開則三影結實則九影花實上皆有黃中二字  
出龍月城西王母愛之過于蟠桃

吳茱萸艾葉川椒杜仲乾木瓜鱉肉瓦上松花仙家謂  
之水炙香

碧瑤杯紅蕤枕紫玉函是仙家三寶

陳搏有大靈豆服一粒四十九日不饑筋骨如故顏色反  
嬰

麋鹿麕是玉署三牲神仙所享故奉道者不忌

修養家謂梳爲水齒丹法用奴婢細意者執梳理髮逾多  
逾神

玉女常以黃玉爲誌如黍米在鼻上無此者鬼試人也  
朱草莖如珊瑚刻之汁流如血以玉投汁中九之如泥久  
卽成水以金投之曰金漿以玉投之曰玉醴服之長生  
馮夷服八食得水仙此一馮夷也淮南子曰馮夷大丙之  
御也乘雲車入雲蜺許叔重云古之得道能御陰陽者  
又一馮夷也

范蠡隱于五湖屢更其號最後稱海濱漁父爲孔安國之  
師安國服鈇丹壽三百歲

心之爲字蓋覆火也火炎上養心者抑而下之此制字之  
義也養生者取出字卽坎三卦也

師延撫一絃琴孫登撫一絃琴王元美知有馬明生耳

水碧金膏靈運詩金膏滅明光水碧輟流溫江文通水碧  
驗未黷金膏靈詎緇又倣倪摘木芝凌波采水碧李詩  
水碧或可采金膏秘莫言

羸女并怪名好吹簫子美詩更有馮夷來擊鼓始知羸女  
善吹簫註以爲弄玉非也張東之詩淮南有小山羸女  
隱其間

苾芻生不背日冬夏常青體性柔軟香氣遠騰引蔓傍布  
草有五義故以名僧

芬陀利華斜光下等六天所種

鷄冠花佛書謂之波羅奢花

袈裟佛典作袈裟一名逍遙服一名無塵衣又名水田衣

王維詩乞飯從香積裁木學水田又名稻畦帔王少伯詩手巾花氎淨香帔稻畦成

跋遮那袈裟環也

頻婆果經云美好如頻婆果釋云端正也翻譯名義云相思也二說不同

香界高適詩香界泯羣有香阜江總詩息舟候香阜悵別在寒林仁祠皎然詩仁祠當絕境明牧躡靈踪又陳青凋亡後仁祠識舊山柰園王勃詩柰園欣八正南史扶南傳曰佛髮青而細如藕絲

佛以乳香楓香爲天澤香椒蘭蕙芷爲天末香又天末香莫若牛頭旃檀天澤香莫若詹糖薰陸天華香莫若

榮蘭伊蒲後漢所謂伊蒲之供是也

東坡奎宸閣碑銘巍巍仁聖體合自然神耀得道非有師傳八師經梵志曰吾聞佛道厥義弘深巍巍堂堂猶星中月神智妙達衆聖中丕願開盲瞑釋其愚癡佛世尊曰吾前世師其名難數吾今自然神耀得道非有師傳也八師不殺不盜不淫不惡口不飲酒老病死

佛典奇草芳花能逆風開薰別賦閨中風煖塞上草薰六一詞草薰風暖搖征轡用此薰今誤作芳

婦人首裝曰鬢華嚴謂之華鬘樂天詩華鬘抖擻龍蛇動或省作鬢高僧傳枝附鬢葉又作髻要雅云髻燒烟畫眉也汪伯玉贈伎曲縞帶全拋華鬘

抖擻抖擻也



遠公弟子惠要患山中無刻漏乃于水上制十二銅葉芙蓉因波隨轉分別旦夕以爲行道之節名蓮花漏張喬詩遠公窻下蓮花漏猶向山中禮六時何兆詩芙蓉十二池心漏簷蔔三千灌頂香

古今共譯一切陀羅尼末句云莎嚩訶皆不切考清濁遂使命章有異傳誦不一或云娑婆訶或云馭幡訶等九呼不倫楷定梵音悉無本旨自是當時執筆之誤故尅反上嚩訶爲正矣

三伊字作小最尊之辭如蒲曰伊蒲蘭曰伊蘭是也王維詩三點成伊猶有相教乘法數有二伊之文謂新伊舊伊也

佛經謂柳曰尼俱律陀木覆盆子花曰蘇密那花

始則獨頭無明二障次之極則至于八萬四千諸塵勞門此所生染法之名數也始以一心二空次之極則至于八萬四千清淨法門此所生清淨之名數也

阿那律陀無目而見跋難陀龍無耳而聽殢伽神女非鼻而聞香驕梵鉢提異舌知味舜若多神無身覺觸

楞嚴經云純燒沉水無令見火此自佛以來相傳燒香法也

獲嘉禿士貫微奢僧如貴子弟旋織小疊勝羅染椹服號紫織方

老子始生其母名之曰玄祿

李郭侯先墓曰靈城

竹萌一名竹胎一名籜龍東坡詩斤斧何曾赦籜龍一名玉版和尚暹羅迦邏島名佛影蔬

令草

萱

丹茗

石榴

栗皴子美詩嘗果栗皴開周繇詩開栗弋之紫皴貫休詩新蟬避栗皴

朱仲李色黃大如櫻桃漢獻帝所植潘岳間居賦云房陵朱仲之李王逸荔枝賦房陵縹李

仁頻一名櫝門卽櫝榔也上林賦注櫝也何謬

護門草一名百靈艸王筠詩霜被守官槐風驚護門草

龍鍾

竹

抱朴子朱炎礪石不靡蕭丘之木凝氷慘慄不凋款冬之花用修謂出佛經誤

禹餘糧一名自然穀一名自然粦名篩實如大麥七月熟與太乙餘糧一種特精粗異耳殼若薨未凝者黃水久凝則或青或白或赤或黃年多漸紫自赤至紫名太乙諸色通云餘糧也

按張司空云是還魂石中黃子鬼神禽獸守之不可妄得又似石類本草亦居石部當別是一種也

合歡蠲忿萱草忘憂合歡卽夜合一名合昏一名青裳詩焉得諼草言樹之背以其忘故云諼諼忘也背堂北也士衡詩焉得忘歸草言樹背與襟忘歸旣誤背又誤解

一云萱草忘憂臯蘇釋勞

文無

當歸

可離

芍藥

五芝石芝木芝草芝肉芝菌芝蟾三千年頂生肉芝抱朴  
子曰行山中見小兒乘車馬長七八寸此肉芝也服之  
長生

泰山有青芝亦名龍芝抱朴子云青芝如翠羽光明洞徹  
如堅冰良常山有螢火芝葉似草大如豆紫花夜視有  
光食一枚心中一孔明食至七心七竅洞徹可以夜書  
王元美載芝名甚衆遺此

七明九光石芝名威喜樊桃木芝名獨搖牛角龍仙草  
芝名

槐生五日兔耳十日鼠耳

秦室山有木葉如梨而赤理名曰指木服之不妬

菴施草爾雅作卷施拔心不死注宿莽也離騷云王僧孺  
詩譬如菴施草心謝葉空存王筠詩菴施心未發靡蕪  
葉欲齊

唐保大間詔苑令取浥溪美爲馨烈侯擁培之具

唐莊宗牡丹名

百葉仙人

月宮花

小黃嬌

雪夫人

蓬萊相公

粉奴香

卯心黃

御衣紅

紫龍盃

三雲紫

盤紫酥

天王子

出樣黃

火焰奴

太平樓閣

薔薇一名玉鷄苗子晉與道士浮丘游伊洛之浦始受玉鷄之瑞

芍藥一名婪尾春胡嶠詩餅裡數枝婪尾春蘇鶚以酒巡  
帀爲婪尾樂天詩三盃藍尾酒歲盡能推藍尾酒東坡  
詩藍尾忽驚新火後遨頭要及浣花前又作藍尾矣  
蔗有昆崙蔗夾苗蔗青灰蔗枕榔蔗

鷄冠棗宜作脯醢酬棗宜生啖

新羅松子有玉角香重堂棗御家長龍牙子河東葡萄有  
百二子紫粉頭洛南瓜有御蟬香挹腰綠

葵趙瓜極盛道路濃香故云未至舌交先以鼻選  
茄名落蘇煬帝名昆侖紫瓜故曰崑味

菰菜笋奴茵妾

薔蔔梔子一名木丹一名越桃

白藕

藕

烏桕

桕

漢苑人形柳一日三起三倒李商隱江之嫖賦豈知河畔  
牛星隔歲祇聞一過不及苑中人柳終朝剩得三眠  
桃黃吞之却食

菱華背日芙蓉向日菱華日舒夜歛芙蓉晝合宵炕蘇子  
由詩芙蓉初生縐如縠南風吹開輪轉轂紫苞青刺攢  
蠟毛水面放花波裏襲森然赤手初莫近誰料明珠藏  
滿腹姜梅山詩蠟腹出波烹芙蓉實裹蹄和露摘蓮房

張公夏梨出洛陽北郊海內惟一樹潘岳賦張公大谷之



梨許渾詩藤蔓覆梨張谷暗

柿有七絕一壽二多陰三無鳥巢四無蟲五霜葉可玩六  
嘉實七落葉肥大

竹祖 桐君 桃奴一名梟桃桃實經冬不落者能殺百  
鬼 栗奴取簡勝栗一石加栗奴五斗春之栗奴能令  
馨香 木奴 木仙 草帝謝調芭蕉歌草中一種無  
比倫瑣屑蒿萊望帝尊 稻孫南海稻經獲再生名稻  
孫 穗穉

薛越文草可爲布上林賦薛莎青蘋文選焦葛升越弱于  
綺羅

橄欖爲楫撥魚則浮骨鯁以玉簪花根汁滴之則化

茸母北地寒食始生徽宗詩茸母初生認禁烟

杜衡卽杜若或曰非也杜衡爾雅謂之土鹵苗似細辛葉如馬蹄故一名馬蹄香臭如薜蘿食之已瘕杜若廣雅謂之楚衡陶隱居所謂葉似廉薑而有文理根似高良姜而細味辛香又絕似旋復根者也唐慎微云旋復根卽真杜若

桃都山蟠桃枝覆三千里有天鷄鳴焉

太陽之草曰黃精餌之長生太陰之草曰鈎吻入口輒死黃精一名重樓一名菟竹一名鷄格一名救窮一名鹿竹

藥大毒有六一鈎吻二鴆三陰命四內童五鳩羽六螭蛭

櫻桃一名含桃一名荆桃一名石蜜一名崖蜜杜詩崖蜜亦易求又露崖蜜松花熟山杯竹葉春東坡橄欖詩待得微甘回齒頰已輸崖蜜十分甜是也糖霜亦名石蜜涼州異物志謂石蜜之滋甜于浮萍非蜂之類假石之名實出甘柘變而逾輕是也棗名木蜜榧木亦名木蜜枳句子依房生著枝鱗大如指長數寸狀如珊瑚噉之甘美冷酒味薄名樹蜜曲禮婦人之贊棋是也蜀中有蜂子野竹上結蜜紺色甘美倍常名竹蜜安南有果大如東瓜皮有軟刺香甜飽人名波羅蜜高昌國南平羊刺無葉蜜色白而味甘鹽城羊刺葉大蜜色青而味薄名刺蜜交河沙中草頭有刺刺上有毛毛中生蜜名草

蜜亦名刺蜜胡人呼爲給勃羅

劉慥射一鹿剖五臟以草塞之厥然而起慥密錄此草種  
之治傷折呼爲劉慥草此與劉寄奴甚類酉陽雜俎云  
卽天名精一云鹿活通志云天名精曰麥句薑曰蝦蟇  
藍曰豕首曰天門精曰薺顧曰蟾蜍蘭曰覲曰荊蓺曰  
稀首曰天蔓精曰鹿活草曰劉慥草爾雅云荊甄豕首  
俗曰稀發又云火欬又云地菰

杭州憲司有松化石鱗皴宛然蒼皮黛色永康延真觀前  
唐有道士指庭松曰此已三千年當化爲石至夕大風  
雨果化石青州譙氏堂後有柿圍三尺凍裂根中有奇  
石長袤丈紋理瑩然碧色可愛

濟南分流山有金杏上飲天漿下啜地沫故其生繁大於梨黃於橘武帝訪蓬瀛有獻者帝嘉之故亦名漢帝果簡子藤生綠樹木實如梨赤如鷄冠核如魚鱗取生食之淡泊甘苦蕭子雲賦長卿晚翠簡子秋紅廣志侯驤蔓生子如鷄卵旣甘且冷輕身消酒卽此

龍芻馬食之行千里古語一食龍芻化爲龍駒

桂蠹蓼蟲楚辭注桂蠹以喻食祿之臣蓼蟲以喻放逐之士按文帝遣使南越回獻桂蠹一器又大業拾遺錄桂蠹紫色有香噉之已陰痿之疾

諸城有孝子灣亘四五里清瑩不涸嚴冬冰合惟中央二三尺不凍相傳爲王祥臥冰處上有祠

中外  
我

富彥國在青社河北饑民爭歸之夫婦棄一兒空塚中比  
歸復過則兒肥健于昔塚中有蟾蜍如車輪氣咻咻意  
兒呼吸此氣自爾遂不食也抱朴子載陳弓異聞記云  
同郡人張廣遭亂女四歲不能行棄塚中後三年還女  
猶生問其故女曰糧盡以後見塚角一物申頸吞氣效  
之不復饑尋視乃大龜也與此甚類

古謂龍嗜燕聞緇青人家燕巢中赤色光芒有聲若鼓老  
父以杖探之有一小赤龍尺餘墮地忽一大龍丈餘徐  
擁其子破屋而去又一家燕巢產白鳳雛三尺許

鍾乳有石鍾乳竹乳茅乳無問厚薄但光澤瑩淨者卽堪  
入煉黃赤二色不堪也

宋留元寂長山捕一狸剖腹得一狸又剖之又得一狸三狸雖相苞而小大不殊掛皮於屋夜有羣狸繞之號失皮所在

孔子厄陳有人長九尺皂衣高冠聲動左右子路戰於庭什地乃大鯁魚也孔子曰吾聞物老羣精依之因衰而至

東海中有半體魚狀如牛剝其皮縣之水至則毛起潮去則毛伏海驢皮亦然

嚴僖與許由爲友蜀之嚴道人隱雅州應曜隱居淮上與四皓同徵而不出擊峻字伯陵隱於汧山司馬遷以書招之不從牛牢魏郡人立志不與光武交徐舫劉基宋

濂往訪之荷簑笠以見數事皆不見正史

女侍中魏元又妻也女學士孔貴嬪也女校書薛濤也女進士宋林妙玉也女狀元蜀黃崇嘏也按金石錄有超彥深母傳太妃亦曾爲女侍中又有清河王岳母山氏封郡君亦授女侍中

謝莊以風月景山水名五子颶肱顙捉蒲也宋子虛名友五子鑫森森焱焱近一士夫亦襲用之

氏族書有吞景雲

在切

賈誼新書有髮子漢唐君碑有間

葵班戰國策有縹錯有挈薄漢書有姓偉李鼎祚周易

集解有宋衷

宋音森

鰕魚字輶人



古呼獄參軍爲長流少昊崩神降長流之山于祀主秋  
沮誦與倉頡始作書契

駟瞻曰牙郎本作互郎二字相近舛相襲耳

年壯而艾髮者曰算髮本草云蕪菁子壓油塗頭能變蒜  
髮陸德明曰黑白雜爲宣髮三字不同說卦巽爲宣髮  
繇音護絲繩也見金陵學宮所刻山谷辨剛卯說今煨久  
矣

禹女之儀狄也衛夫人之濛也漢之許負也女而男名也  
晉之馮婦也吳之暨艷也男而女名也衛濛字茂漪汝  
陰太守李矩妻暨艷附陸抗傳許負相亞夫者河內溫  
人老嫗也高祖封爲鳴雌侯

太真名玉環一名玉奴潘淑妃名玉兒東坡梅詩玉奴終  
不負東昏以玉兒身死國除不擬負他語而曰玉奴何  
也臨春結綺荒荆棘又誤爲張麗華一事而兩誤

翠筑蕤莢實也江淹去故鄉賦北風枿兮絳花落流水散  
兮翠筑疎

懷夢草余夙以對返魂香今觀南海睡蓮正可對夢草耳  
夢草晝入地夜復出似蒲色紅贊去帝之季女名曰瑶  
姬精魂化草實爲靈芝媚而服之則與夢期

槐木陳枚較莊子陳人又奇流甘露于槐木扇惠風于陳  
枚

石雞清響以應潮故一名潮雞

鯧大蝦也出海中者長二三丈游則豎其鬚鬚長數尺可爲簾也

閩有梅蝦蘆蝦泥蝦苗蝦洵家傳云子多

足足懷仁般般擾義鷗鷗之信不如鷹周周之智不如鴻用修旣謂天祿爲蝦蟆又謂一角爲天祿兩角爲辟邪蝦蟆豈有角耶沈約宋書天鹿純靈之獸五色光耀洞明天鹿疑卽天祿

鱒魚如蚶而彘尾廣志云鱒似便面揚箸似帆一曰鱒帆鱒帆如便面海鏡似搔頭

濱海以魚爲飯曰鱸飡江賦食則蔬鱸靖州圖經其俗以魚爲蔬湖北謂之魚菜杜詩小白羣鮒然二寸魚

細微沾水族風俗當園蔬余嘗有詩云蠡蔬酒堪醅指  
此又成都以魚爲米亦曰魚米

寄居殼似蝸一頭小螺一頭螺蛤寄在殼間常候蝸開出  
食螺欲合遽入殼中瑣瑁似蟀一小蟹在腹中爲瑣瑁  
出求食或不歸而餒死淮南人名之蟹奴海南名螭奴  
水母名螭一名蛇又名樗蒲魚又名海鰲如羊胃以蝦  
爲目江賦瑣瑁腹蟹水母目蝦少時曾見之鄉人名狎  
潮

龍九子囚牛好音樂故居胡琴睚眦好殺故居刀柄嘲風  
好險故居殿角蒲牢好鳴故居鐘紐狻猊好坐故爲佛  
坐霸下好負重故用載碑菽園雜記云鼉好負重故

用載碑、螭吻好望、故立屋角、徒牢好吼、故懸鐘上、憲章  
好囚、故居獄門、饕餮好食、故立橋上、蟋蟀好腥、故居刀  
柄、螻蛄好風雨、故立殿脊、螭好文、故立碑首、金猊好烟、  
故居爐蓋、椒圖好閉、故居門上、蚺蛇好險、故立護坊、鰲  
魚好吞火、故立屋脊、獸吻好食陰邪、故立門環、金吾性  
不睡、故用巡警、此事又考得狴犴好訟、故居獄門、負屨  
好文、故居碑蹲、蚩吻好吞、故居殿脊、霸下卽鼉鳳一名  
赑屃、又作臂係、

孝宗曾詢之李東陽、李遍索止得其六、菽園雜記所載全  
不相襲、又得十四、以俟博雅、

博雅、蠹蝸魚、伯青、蚨也、搜神記南海有蟲名蜺蝸、如蟬、大

辛美可食子如蠶種殺其母塗錢子塗貫用錢則自還  
卽青蚨也或曰今閩廣所食龍蝨是

蜀蠶女父爲人掠惟乘馬在母誓得父者娶以女馬迅去  
得父還父違誓殺馬曝其皮皮捲女飛女化爲蠶披馬  
皮謂之馬頭娘蜀人祀以祈蠶此與繫瓠事甚類蜀曰  
蠶叢豈謂是耶

鱷形如鼉喙長半其身牙如鋸尾有二鈎甚利遇鹿豕尾  
戟之以食

鮑鱸鮑瓢也劉向九歎莞芎棄於澤洲兮鮑鱸囊於筐簞  
子渲梳頭宮樣粧本劉禹錫贈杜司空伎詩今作高髻雲  
髮又作韋詩謬二矣一作髮鬢梳頭宮裝名也畫家謂

渲染

南史桂山篁渚非止素玩碧澗清潭翻成麗暘

語忘敬遺二鬼婦人臨產呼之不害人

狐狼知孤虛虎豹識衝破

離上無尋鸚上有文鸚上有赤

籍孺韓嫣形嬰骨蘭皮媚色稱論衡嬰與麗同蘭奸同二

字未見

重足側立腹誹心呶心呶卽心非

孝經援神契王者德至于地則華苹生祥瑞圖曰雙蓮爲

苹東都賦又作華平云植華平于春圃蓮豈通圃植耶

係臂如龜生於海洲欲先捕之必祭以求有不信者風波

覆舟按係臂當作臂係與鼃鼃字異音同似玳瑁而薄  
卽龜同也吳都賦巨鼃鼃屬廣韻以爲鼃一雌鼃爲鼃  
今碑耐象之龍九子之一也用修以臂係爲海錯而以  
鼃屬爲螭吻之屬何謂一作紫螭吳都賦捫紫螭

青桐子生秦鄂間如乳曰桐乳莊子桐乳致巢是也庾信  
詩草衙長帶桐垂細乳又桐井曉寒千乳結茗園春嫩  
一旗開亦有致桐有四種一曰白桐一曰荏桐一曰岡  
桐一曰梧桐卽青桐也又名櫬白桐榮而不實亦名榮  
桐木陶詩冉冉榮木結根在茲

欹案始于曹公六朝人作隱囊又便于欹案王維詩隱囊  
紗帽坐彈碁



今之米糊羹楚辭精瓊麋以爲糧

蓮子湖目芡實水芝

南方荒中有如何樹三百歲華九百歲實如棗長五尺金  
刀割之則飴非此則辛食之得地仙西陽雜俎云出祁  
連山名四味木竹刀割則苦木刀割則酸盧刀割則辛  
金刀割則甘或曰卽火棗 山名四味木竹刀割則苦木刀割則酸盧刀割則辛  
闔廬庖所夏日曰水厨

糟者猶糟實者猶實玉者猶玉血者猶血酒者猶酒  
巫覡曰瑤耗見本草

夢 習苦桂靈喜甘大睡劇于據梧長昏甚於枕麴陽燧  
舍景遺臂日輪甘露入盤足稱天酒

天寶有兩鸚鵡一雪衣女侍貴妃誦經者也一綠衣使者  
訟楊崇義冤者也張說爲作傳

西涼國進瑞炭百條青硬如鐵長尺餘可燒十日無焰有  
光熱氣追人不可近也

南方有魚取脂以照力作則暗照饗餐之具則甚焰時號  
饅魚燈每見漁家以江豚脂爲照名懶婦燈卽此物耳  
酉陽雜俎云奔解非魚非蛟大如船長二三丈色如鮎  
有兩乳在腹下相傳懶婦所化一頭得膏三百斛取之  
燒燈照讀書紡績輒暗照歡樂之處則明

興慶池南有醒醉草葉紫而心殷醉者嗅之立醒木芍藥

亦爲醒酒花

王莽改泉爲白水真人五銖自稱爲上清童子政堪作對  
耳趙德麟青州從事對白水真人東坡詩孰意青州六  
從事化爲烏有一先生

華清有端正樓貴妃梳掠之所○有蓮花湯貴妃澡浴之室  
唐女妓入宜春院者曰內人亦曰上頭人亦曰內家趙德  
麟謂得幸者爲十家遂引鄭嵎詩十家三國爭光輝不  
知明皇時十宅諸王與韓號最爲寵盛鄭詩指此爾  
山家清事臘月剖修竹相接各釘以竹丁引泉之甘者貯  
之竹誘剖竹走源泉又竹竿裊裊細泉分是也聞閩中  
不特引供茗事千百相連置之田間以當溝洫仁和李  
夫人詩云引泉竹溜穿厨入墮粉松花遶舍香閨奩中

有此殊多林下風

五月十三日爲酈注日八月八日爲醉日亦爲迷日  
藥欄今作花藥之欄非也漢宣詔曰池藥未幸御者假與  
貧民注以竹繩連爲禁藥老杜亦誤用

岷山之下凶年以蹲鴟爲梁本草謂之土芝芋也

生而避諱者杜操避魏武諱以字行曰度死而避諱者蒯  
徹史避漢武諱曰通山避諱者恒山避漢文諱改曰常  
山姓避諱者莊周曰嚴周子陵曰嚴子陵南華曰嚴子  
莊助曰嚴助宣帝諱荀改荀卿爲孫卿

腊肉謂之寒寒與韓通鹽鐵論羊淹鷄寒劉熙釋名韓羊  
韓雞是也曹植樂府寒驚炙熊蹯五臣乃竄寒驚爲烹

繁七居寒芳蓮之巢龜竄焉寒芳蓮之巢龜

策王芻注策蓐也今呼鷓鴣脚莎按本草作葢草葉似竹而  
細薄莖圓小生溪側竹篇蓄注似小藜赤莖節生道旁  
二草似竹而非故淇澳二章云青青三章云如簧耳謝  
莊竹贊瞻彼中唐綠竹漪漪甚謬而資暇錄辨之復不  
能曉然別其爲二爾雅何可不讀

積石山之桃實大如十斛籠洪武中出巨桃核長五寸廣  
三寸七分蔑矣

龍鐘竹名枝葉垂委不能自扶故老敝曰龍鐘資暇錄謬  
謂鐘卽泮龍致雨上下所踐之鐘淋漓濺澌此成何語  
耶

藥有甘草茶亦名甘草清異錄謂陸羽爲甘草癖是也藤亦有甘草出潮陽及南漳資暇錄謂叢似薔薇葉似夜合花淺紫而藥黃枝葉俱甜故亦名甘草

去陰就陽謂之陽鳥鳩鴈是也純黑而反哺者謂之鳥小而腹下白不反哺者謂之鴉鳥白項而羣飛者謂之燕鳥白脰鳥也鴉鳥鶯也亦曰鸚鵡日冬漸南夏至漸北鴈之南北與日進退隨陽之鳥故曰陽鳥日亦名陽鳥見廣雅蜀都賦陽鳥廻翼於高標王半山詩鴻鴈無定栖隨陽以南北

考工深其爪出其目作其鱗之而之而頰之髭鬣也半山押而字采鯨抗波濤風作鱗之而奇絕

西樓有蒲瀕水叢生一幹葉如柳不盈尋丈用以作箭不  
矯揉而堅左氏所謂董澤之蒲是也

堯之時窳窳封豕鑿齒皆爲人害應劭云窳窳類貙虎爪  
食人山海經窳窳蛇身人面爲二負之臣危所殺開明  
東有巫夾窳窳之尸皆搽不死之藥以拒之窳窳變爲  
龍首居弱水中食人淵明詩窳窳強能變祖江遂獨死  
是也鑿齒齒長五尺似鑿亦食人長楊賦昔有彊秦封  
豕其土窳窳其民鑿齒之徒相與磨牙而爭之封豕一  
作封豨山海經謂帝喾二負疎屬之山桎其右足反縛  
兩手以髮繫之盤石之下宣帝時見之

漢書水居千石魚波卽言養魚一歲收千石也吳中買魚

論斗酒乃論斤皮日休詩一斗霜鱗換濁醪

鐵室甲也韓非子矢來有鄉則積鐵以備一鄉矢來無鄉則鐵室以盡備之

金斗熨波刀剪紋樂天波平熨不如龜蒙又天如重熨皺綠波

如熨豁愁腸庭筠金斗熨沉香又金斗熨秋江王君玉

東漢既擒白波賊卷之如席故謂痛飲爲卷白波一曰酒

令名打嫌調笑易飲訝卷波遲調笑打曲名

考工記犀甲壽百年兕甲壽二百年合甲壽三百年唐書

百官志席壽三年氍毹壽五年櫛壽七年本此

虬泉池有追雲舟起風舟待仙舟含烟舟或以沙棠爲櫓

櫂或以木蘭文柘爲櫓棹李詩木蘭之柘沙棠舟用此



赤豆湯洗色衣垢楊桃去粘研芥子入豆醬不生蠹牛乳  
去油

殷七子名鄴多術嘗呪水成濃醪柳土成鹽二日令屏上  
人唱歌聲清亮似從屏中出歌曰愁見唱陽春令人離  
腸結郎去未回歸柳自飄輕雪  
都夷香如棗核食一片歷月不饑以粟許投水俄滿大盂  
垂龍木高十丈有朱露色如丹汁灑其葉皆成珠亦名珍  
珠樹

波祇國有神精香草亦名荃蘿亦名春蕪一根百條皮如  
絃可爲布所謂春蕪布又名香荃布握一片滿室皆香  
婦人帶之彌芬馥

翕韓國有飛骸獸狀如鹿青色以寒青之絲繫之及死惟繫處存而頭尾及骨皆飛去此必大蛇嶂嶸細棗出嶂嶸山山臨碧海萬年一實咋之有膏膏可然燈王母握以獻武帝

招仙閣有浮金輕玉之磬浮金金浮水上今海濱亦有浮石余親見之金石皆堅重此謂何

漢武帝有沉光香精祇香明廷香金碑香塗魂香

瑤琨去玉門九萬里碧草如麥割之作釀味如醇醪飲一合三旬不醒

塗山之背梨大如升或曰斗紫色千年一花亦曰紫輕梨林國去長安九千里生玉葉李色如碧玉數十年一熟味

酸韓終嘗餌之名韓終李

劉遺民曾爲柴桑令今多以爲淵明謬也樂天詩木落天晴山翠開愛山騎馬入山來心知不及柴桑令一宿西林便却回

五味草初生味甘花時味酸食之不眠故一名却睡草出末多國

掌中芥葉如松子置掌中吹之一吹長一尺至三尺然後可移于地不然不生也食之能空中孤立足不躡地亦名躡空草紅紫之說石以爲此草一闔衣柰大如斗甜如蜜核紫花青研之有汁如漆染衣不可漚浣以水取此衣不爲漚

肝爪長一尺花紅葉素生於冰谷暇丘仲食之千歲不  
渴嘗有霜如蜜滓

玄都翠水有菱碧色狀如雞飛亦名翔鷄菱仙人晁伯子  
常採食之

遠飛鷄如鵠大色紫翼下有目亦名目羽鷄嘗銜桂實歸  
南山衆仙以釀酒曰桂醪嘗一滴舉體如金陸通嘗餌  
黃桂之酒

臯陶嗜而爲大理此劉安怪誕之談不爾當云即使臯陶  
嗜而爲大理民亦不寃也蓋假令之辭耳謂臯陶真嗜  
則虞書臯陶謨執都而執兪之

侯古音胡詩羔羊如濡洵美且侯易林季姬踟躕望我城

隅終日至暮不見齊侯喉亦音胡後漢童謡吏買馬君  
具車請爲諸君鼓嚨嘲晉志前年食白飯今年食麥孚  
天公誅謫汝教汝捻嚨嘲濁古音獨孟子滄浪之水濁  
兮可以濯我足兮史記潁水清灌氏寧潁水濁灌氏族  
儀音俄詩實惟我儀叶在彼中河太玄各遵其儀叶不  
偏不頗爽古音霜詩女也不爽士二其行又其德不爽  
壽考不忘老子五味令人口爽英古於良切楚詞浴蘭  
兮沐芳華采采兮若英荀卿賦仁人紉約傲暴擅強天  
下幽險恐失世英采此禮切參差荇菜左右采之窈窕  
淑女琴瑟友之采采芣苢薄言采之采采芣苢薄言有  
之蒹葭采采白露未已所謂伊人在水之渼華音敷易

枯楊生華、老婦得其士、夫漢書仕宦當作執金吾娶妻  
當得殷麗華、田音陳、易林邪徑賊田、政惡傷民、又宣髮  
龍身爲王主、田漢童謠邪徑賊良田、讒口害善人、桂樹  
花不實、黃雀巢其顛、謀莫胡切、易林狼戾靡謀、無言不  
殊、又張陳嘉謀、贊成復都牙、叱胡切、詩予王之爪牙、胡  
轉予于恤、靡所止居、太玄首夷其牙、或飫之徒、絺、毅其  
牙、發以張弧、急就章款、冬貝母薑、狼牙亭歷、桔梗、龜骨  
枯山、所旃切、古詩、藁砧今何在、山上復有山、何當大刀  
頭、破鏡飛上天、楚辭、高堂邃宇、檻層軒、層臺累榭、臨高  
山、網戶珠綴、刻方連、口孔五切、詩好言自口、莠言自口  
憂心愈愈、是以有侮、漢書田於何所、池陽谷口、鄭國在

前白渠起後舉重爲雲決渠爲雨涇水一石其泥數斗  
日漑月糞長我禾黍衣食京師億萬之口厚狼口切詩  
蛇蛇碩言出自口矣巧言如簧顏何厚矣易林文王四  
乳仁愛篤厚者果羽切崔駰賦闢四門以博延兮彼幽  
牧之我舉分畫定而計決兮豈云賁于鄙者陸機文當  
究遐德登茲黃耆緝熙有晉克壯常字寫賞羽切詩零  
露漙兮我心寫兮是以有譽處兮諺曰書三寫魚成魯  
帝成虎渴巨列切詩日之夕矣牛羊下括君子于役苟  
無饑渴黃庭經時念太倉不饑渴役使六丁神女謁垂  
公回切蘇武詩胡馬失其羣思心常依依何況雙飛龍  
羽翼臨當垂崔駰達旨淳朴散離人物錯垂高辛攸降

厥趣各違稼古護切詩九月築場圃十月納禾稼易林  
沾洽時澍生我禾稼角盧谷切詩麟之角振振公族誰  
謂雀無角可以穿我屋蛇唐河切詩素絲五紝委蛇委  
蛇楊雄反騷既亡鸞車之幽藹兮駕八龍之委蛇臨江  
瀕而掩涕兮何有九招與九歌降乎攻切詩憂心冲冲  
我心則降楊雄河東賦雲霏霏而來迎兮澤滲漚而下  
降鬱蕭條其幽藹兮滄汎沛以豐隆售時周切詩不我  
能愾反以我爲讎既阻我德賈用不售樂府將頓樓蘭  
郝就解月支裘勿令如李牧功多信不售餐須倫切坎  
坎伐輪兮河之瀦兮河水清且淪猗不稼不穡胡取禾  
三百困兮不狩不獵胡瞻爾廷有縣鶉兮彼君子兮不



素餐兮宋玉九辨竊慕詩人之遺風願托于素餐蹇尤  
拙而無端兮汨莽莽而無垠西昔先窮鳥賦幸賴大賢  
我矜我憐昔濟我南今振我西魏明帝詩涼風夕起悲  
彼秋蟬變形易色隨風東西子建詩驚飈接我出故歸  
彼中田當南而更北謂東而反西哀於希切詩我心傷  
悲莫知我哀國語冬聚其所有以待所歸兮猗兮違兮  
心之哀兮他如風孚金切敵德補切垢果羽切下狼厚  
切馬音某不可殫述今略記其一二蓋自四聲出而古  
韻廢世遂無知者卽有一二知之而聽者如侏儒呶呶  
至不可解嗚呼古道何從復乎此言學古之難  
水荇卽游龍生澤中本草云一名鴻鵠枝幹樛屈著土有

根如龍淮南子謂之屈龍洛神賦宛若游龍意以水華  
方水仙耳詩隰有游龍如驚鴻何毛云紅草也陸璣云  
一名馬蓼草葉大而赤白生水澤中高丈餘爾雅紅龍  
古其大者歸今謂之水蓼俗名水紅不過二三尺爾雅  
又有龍天蓼須葑蓰未知孰是今水中又有龍爪其花  
盤辟如龍或是也但爾雅紅龍古從龍

鼈三足曰能龜三足曰賁

公羊傳諸侯有疾曰負茲注茲新生草也一年草生一蕃  
故以茲爲年古詩爲樂當及時何能待來茲史記武王  
入商康叔封布茲注蓐席也荀子琅玕龍茲華瑾以爲  
寶注龍茲卽龍須或曰茲髭同史記索隱云茲公明草

或作負薪周益公表介竹無功懇辭鄉郡負茲有疾願  
備祠官

計然姓辛名文子因善計而精研故又作計研又作計倪  
漢碑又作岑研岑音計管子周人之王循六岑行陰陽  
處戲以來未有不以輕重而能成其王者也又賓戲研  
桑心計於無垠

淫魚頭與身相半長丈餘鼻正白身正黑口在額下狀似  
鬲有鬚無鱗性喜音聞樂輒昂頭水上聽之淮南子瓠  
巴鼓瑟而淫魚出聽是已今誤作游魚魏文帝詩淫魚  
乘波聽踊躍自浮沉

八駿穆天子傳鼫騶綠耳赤龍白薇渠黃踰輪盜驪山子

拾遺記絕足翻羽奔霄越影踰輝超光騰霧扶翼博物  
志赤驥飛黃白蟻華騶綠耳騶駟渠黃盜驪三書所載  
不一

穀音構樹名皮可爲紙史記桑穀共生王右軍傳禿千兔  
之翰聚無一毫之舛窮萬穀之皮斂無半分之一今穀  
穀穀殊不分

漢書雲起龍驤化爲王侯老杜用其語云攀龍附鳳勢莫  
當天下盡化爲侯王文賦意司契而爲匠老杜意匠慘  
淡經營中詩有客有客亦白其馬老杜有客有客字子  
美此老一字必有元本此指其最無緊關者言耳

王褒聖主得賢臣知賢人君子聖王之所以易海內也是

以嘔喻受之嘔喻音歐由司馬相如凡將篇淮南激楚舞嘔喻古曲名也

淮南子犬羣嗥而入淵曾憶某城雷震合城數十犬奔赴某河死方知古人無誕言也

歐陽公作五代史謂吳越儀衛名稱多如天子惟不改元至著十國世家云聞之故老亦嘗稱帝改元而事無可考獨得其封落星石爲寶石山制書稱寶正六年辛卯耳按辛卯卽唐明宗長興二年又至正中海寧州得古墓有誌碑爲吳越將許俊誌稱寶正三年又寶太元年羅隱記新城縣記云癸未歲癸未乃唐莊宗元年以此知吳越之改元審矣

禪月貫休嘗以詩投錢鏐有滿堂花醉三千客一劍霜寒  
十四州鏐愛其句遣吏諭之曰教和尚改十四州爲四  
十州方與見休曰州亦難添詩亦不改閒雲野鶴何天  
不飛耶遂飄然入蜀

骨咄犀犀之極貴而小者紋如象牙黃色性至毒而能解  
毒陶南村以爲蛇角非

世有兩許俊一唐人爲韓翃奪章臺柳者爲御史中丞都  
押衙一吳越時人亦爲御史中丞都押衙

生柴然火曰櫓拙山谷詩炙背宵眠櫓拙火嚼冰晨飯薩  
波薩可謂奇癖

爾雅蕨蕨注初生無葉可食狀如大雀拳足又如足之蹙

也故謂之蕨周秦曰蕨齊魯曰鰲俗云初生亦類鰲脚  
故云鰲詩陟彼南山言采其蕨沈約郊居賦紫鰲綠施  
太白詩初拳幾枝蕨

疎麻大二圍高數丈四時結實無衰落楚詞采疎麻兮瑤  
華

薜荔本草名絡石在石曰石縹在地曰地錦繞叢木曰長  
春藤又曰龍鱗薜荔又曰扶芳藤離騷披薜荔兮帶女  
蘿

宋世家微子問于少師太師孔安國直以太師爲箕子少  
師爲比干不知周世紀太師疵少師强已明指其人前  
旣以微子啓太師疵少師强混爲一人今復令胥餘冒

疵之名比于侵強之職小司馬猥陋旣誤引安國之注故於下文太師少師乃勸微子去遂不可解而曰少師似誤更不知誰誤耳

夏有鬻熊周亦有鬻熊一爲周師文王以下問焉楚祖也著鬻子二十二篇一爲夏宗伯唐天寶六載詔配享禹于安邑是也

屠蘇平屋也又菴也雪賦韜學恩之飛棟沒屠蘇之高影杜詩願憑金駿褭走署錦屠蘇冠亦名屠蘇以有屋也元康諺曰屠蘇鄣日覆兩耳會見喝兒作天子酒本名酴醾後夏譌爲屠蘇云起自孫思邈取菴名以名酒者附會也



道曰虛皇釋曰空王